

Udin, ai 24 di Avrîl dal 2015

ARLeF E COMITÂT 482: CHÊ DE CJARTE EUROPEANE E À DI JESSI UNE RATIFICHE “BUINE”

In audizion al Senât e intun incuintri cul viceministri Bubbico e je stade ilustrade la posizion condividue tra ARLeF e associazionisim sedi su la convenzion dal Consei di Europe che su la atuazion de normative di tutele

Lu àn spiegât a Udin al viceministri Filippo Bubbico (cun deleghe aes minorancis linguistichis) e tornât a marcâ il dì daûr, a Rome, dilunc di une audizion in Senât.

Pe ARLeF e pal Comitât/Odbor/Komitaat/Comitato 482 (che al met dongje une trentine di realtâts associativis espression de comunitât furlane, slovene e gjermaniche dal Friûl Vignesie Julie) la ratifiche de “Cjarte europeane des lenghis regjonâls o minoritariis” e à di jessi une “buine ratifiche”, ven a stâi previodi cundizions di tutele no inferiôrs a chês za previodudis des leçs statâls e regjonâls in vore.

Dilunc di une audizion romane, li des Comissions Afârs istituzionâls e Afârs foescj dal Senât, i rapresentants di ARLeF e Comitât 482, a àn tornât a fâ la solecitazion urgente ae ratifiche de “Cjarte” presentant ancje cualchi osservazion di merit sui ûs publics de lenghe, scuele e media.

La posizion de Agenzie in rivuart ae ratifiche e jere stade ilustrade dal president de ARLeF, Lorenzo Fabbro, dilunc di un incuintri cun Bubbico, adun ae presidente de Regjon, Debora Serracchiani, e ai assessôrs regjonâi Gianni Torrenti e Loredana Panariti. Te ocasion, presints ancje i parlamentârs Carlo Pegorer e Tamara Blažina, il prefet di Udin, Provvidenza Delfina Raimondo, e rapresentants dal Consei regjonâl e de Universitât dal Friûl, **Fabbro al à frontât ancje altris cuistions in rivuart ae tutele de minorance linguistiche furlane, scomençant de necessitât di intervignî pe formazion e il ricognossiment professionâl dai insegnants di/in lenghe furlane cu la creazion di une classe di concors di pueste e de dibisugne di previodi, tal prossim Contrat di servizi tra il Ministeri des Comunicacions e la Rai, une programazion radiotelevisive juste in lenghe furlane.**

Bubbico al à ancje cjapât sù il pont di viste dal Comitât 482, rapresentât di Carlo Puppo, che tal so intervent al à marcât cemût che lis cuistion frontadis di Fabbro e condividudis ancje di Serracchiani, Panariti e Torrenti, a sedin in sintonie cu lis istancis presentadis dal associazionisim, e si è fermât sui fonts pe aplicazion de leç statâl 482/99, sul tornâju a meti ai nivei originâi e distribuîju cun plui ecuitât. Il Comitât 482, cun di plui, al à stiçât il rapresentant dal Esecutîf su la cuistion des cjartis di identitât bilengâls. Di fat, al coventarès slargjâ il servizi za previodût pai citadins di lenghe francese de Val di Aoste, di lenghe slovene dal Friûl Vignesie Julie, di lenghe todescje e ladine dal Trentin-Sud Tirôl

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<

ancje a chês altris comunitâts minorizadis ricognossudis, ancje furlans e gjermanofons dal Friûl che, cun dut che a son stadis za fatis iniziativis tal passât, fin cumò no àn ancjemò vût rispueste a cheste richieste.

«O vin tirât fûr cuistions tant impuartantis che concretis – al è il coment dal president de ARLeF, Lorenzo Fabbro – che propit par chest a son stadis condividudis sedi cu la Regjon che cul associazionisim. O sperin che sedi pe ratifiche de “Cjarte” che pe scuele, formazion e servizi public radiotelevisîf lis nestrîs osservazions a vedin la atenzion necessarie, cun risultâts sostanzîai». De stesse opinion ancje Silvana Schiavi Fachin dal Comitât 482.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<